

四庫全書

史部

欽定四庫全書

閩中理學淵源考卷八十七

廣平府知府李清馥撰

汀洲洪永宣正以後諸先生學派

按長汀自宋徐氏守忠從學胡安定深於經學受知仁宗厥後寥寥故論者謂海濱四先生倡學及楊羅李朱之學興汀中負笈者甚少元明以來儒術奮起從游有道者復斌斌矣攷洪永以降如賴氏先舒氏

冕吳氏文旭章氏昱皆能淵源正的確述其師承而清脩實德尤可風也茲擇其著者載焉

董先生璘

董璘汀州人永樂中入胄監不仕退充所學莫不淹貫
興禮敦讓為鄉間軌閩書

舒廷瞻先生冕

舒冕字廷瞻武平人太學生游胡文敬之門得用功之
要服膺靡懈冠婚喪祭悉遵家禮父母有疾衣冠侍養

終制廬墓三年

閩書

教授吳景陽先生文旭

吳文旭字景陽連城人少篤學不溺時好聞吳聘君倡道遂受業其門應貢授安遠訓導啟迪生徒規教不振會寇作當道委其勦捕直抵賊巢諭以大義賊皆感服當道以能聞遷銅鼓衛學教授丁內艱歸以不得終養為恨隱居不出林下二十餘年絕跡公門其平居敬義自持勢利不入于心睦族周貧訓子孫以勤儉或有過

引咎自責年八十餘卒

閩書

郡守賴伯啟先生先

賴先字伯啟永定人舉弘治三年進士念親老乞歸養久之始為戶部主事署郎事齋邊餉督鈔關收京倉糧清西蜀屯田悉著賢聲遷員外郎引疾歸正德初逆瑾用事例京官養病者致仕逆瑾誅銓部屢檄不起八年擢常德知府郡小民疲時又修建榮府中官誅求甚峻痛加裁抑民有利病興革則力為之恥為諛說多忤

當道勇退而歸先師事羅一峰而與李空同相善教鄉

處家後進推仰

閩書

縣令周文載先生輅

周輅字文載上杭人知上饒縣歲祲請于朝減常賦三
之一九年以疾歸

閩書

教諭謝先生文寶

謝文寶連城人潛心經學操筆成文授於潛訓導造就
有成遷玉山教諭以疾辭

閩書

訓導李世玉先生元瑤

李元瑤字世玉連城人少年時父患癱躬為吮舐正德八年以貢授袁州訓導知府徐璉檄往寧庶人府賀壽還舟將行而庶人反勒諸教官為之傳檄瑤不屈裂冠袍躍入水中以救免歸白知府備兵應王公文成討賊之舉人稱忠孝焉閩書 通志

主簿舒廷亨先生通

舒通字廷亨武平人性鯁直學問淵源正德七年以平

寇有功拔入胄監初任會同簿補任東陽所至有聲

閩書

縣令楊子晦先生昱

楊昱長汀人知都昌縣操履端嚴布袍蔬食減偏累民糧歲旱祈禱輒應民居遭火叩首隨滅致仕歸

閩書

童克剛先生世堅

童世堅字克剛連城人正德癸酉應貢京師不就嘆曰此時閩寺熏燭道與世違可以隱矣遂結廬於晝錦橋東扁曰尋樂時王文成倡道東南世堅走謁請業歸而

沈潛體認充然有得邑人稱曰尋樂先生孫大樑

王先生盧淵學派

王盧淵先生未詳俟考焉

孝廉范文堅先生金

范金字文堅上杭人性沈靜寡言從王盧淵受春秋永樂癸卯以經義甲一省正統間典始興陵水二庠教既以疾歸養二十餘年士子樂從之閩書

許先生浩志學派

許氏浩志亦一時師表

教諭許先生浩志

許浩志連城人正統中鄉薦以親老就養授同安教諭
將奉親之任抵家遇寇發率鄉人登冠旁寨協力保障
邑賴生全閩書

教授李善徵先生慶

孫元泰

李慶字善徵連城人受業於許浩志素富文辭尤長詩
賦任封川學諭多所造就遷撫州學教授便道抵家值

沙寇攻縣與浩志籌辦方畧備禦之寇平偕其徒童昱倡道開講後改任溫州卒于官孫元泰字汝嚴講學遵禮胸中具輪畧以歲貢授太平訓導值倭亂當道延之叅謀遂致克捷尋告歸會賊先後逼城元泰偕當道贊畫督勦以勞致疾卒閩書

童道彰先生昱

童昱字道彰連城人少從李慶遊甚為器重及長慕吳聘君學私淑其門不樂仕進卜築文溪之東名曰東臯

清隱李慶為作東臯清隱賦

閩中理學淵源考卷八十七

欽定四庫全書

閩中理學淵源考卷八十八

廣平府知府李清馥撰

嘉隆以後諸先生學派

嘉隆以後諸先生皆崇尚閩學宗派而品式規畫猶
儒者之選也彼時時尚異趨而沈氏士鑑李氏世熊
皆能求師問學卓有豎立其論著亦多足稱可覘風

尚之懿云

通判陳體元先生仁

陳仁字體元歸化人嘗從湛甘泉若水學嘉靖元年由明經授廣西府通判時粵地文教未闡仁至大為闡揚激勵士類蒞民有惠政致仕歸以講究性命為事士林宗之通志

州守鄧元植先生向榮

鄧向榮字元植自清流徙居長汀嘉靖甲辰進士授戶部主事監督淮運杜絕諸弊以直言忤時謫六安同知

轉嘉定州甫二日聞父病遂棄官歸舊業腴者悉推與弟著有正學準則太極通書考惜陰考等書通志

恭靖裴元閣先生應章

裴應章字元閣清流人隆慶戊辰進士授行人奉使德晉二府陞見奏對進止有度神宗目屬焉擢吏科給事遷兵部都給事所奏制馭悉中機宜念邊將玩愒大吏相與為欺蔽遂劾罷撫臣之棄師憲臣之昏庸與勲臣之不法將臣之縱賊唆卒者風采肅然江陵當國嘗建

議三歲一遣大臣行邊應章言糜費當罷大璫保欲取
冏寺馬三千疋應章議勿予遷太僕少卿所上疏給闕
防嚴舉劾戒侵剋數寄養諸事皆稱旨著為令力請歸
省抵舍旬餘而母氏病終轉太常正卿議侑享祔葬禮
下禮臣報可鄖卒辱撫臣將為亂廷議非應章莫能定
被命馳往未至先檄諭以禍福語甚切至亂卒計窮自
縛至數百里外迎應章應章集衆斬其魁餘無所問閩
境晏如自鄖入為戶部右侍郎復請歸養久之而父沒

神宗即家起應章為少宰所推轂皆海內賢士已請歸
襄葬事晉南司空遂得疾力辭屢疏不允乃強赴立法
疏錢幣諫採鷹架木糾中貴人濫索省水衡錢甚多尋
乞歸復起南太宰累疏懇辭虛席者三年卒謚恭靖有
集若干卷通志 閩書

黃士登先生科

黃科字士登永定人學問淵美博究羣書學者多師事
之將貢而歿士類惜焉子益純領鄉薦閩書

教授賴公弼先生祐

賴祐字公弼清流人才敏博學治書經旁通春秋以監生任臨桂教授一時科甲多出其門

閩書

訓導蔣先生永洪

蔣永洪連城人授訓導莅教三年引疾歸晚彌好學鄉弟子從受業者日衆守道安貧恬如也

閩書

教授盧念潭先生一松

盧一松號念潭永定人萬曆間以貢授吉王府教授謂

宗藩之學與韋布異乃摘四書中切於修齊治平者各一條名曰要學三編以進王嘉納之所著學道要端并田議化俗議醒心詩宗孔集行於世通志 閩書

李嗣英先生穎

李穎字嗣英上杭人天資雋異年十三或授以老子書曰學者當師孔孟何用此為從永豐邱賢遊都諫邱弘謂穎詩文煙霞風月陶寫性情皆自然流出居梅坡著有梅隱稿又輯宋元鄉先輩詩名杭州風雅集通志

教授李安定先生瀾

李瀾長汀人孝友端方學遵朱子以躬行實踐為主萬
曆間由明經授松溪訓之任距松溪三十里遇鄉人言
母卒瀾痛哭不俟家報即馳歸服闋改訓漳平陞諭安
定再陞授平海未任卒

縣令賴巒宗先生維嶽

賴維嶽字巒宗永定人萬曆間舉人由永春教諭歷興
寧令嗜古學多著述有古今襄金湧集半豹集行世通志

孝廉沈先生士鑑

沈士鑑長汀人少孤力學博洽羣籍崇禎己卯舉於鄉有清夢齋詩集四書叅註孔門崇祀議藏於家通志

裴先生汝申

裴汝申清流人善詩文與李本寧曹學佺相唱和後挈家入南山有薛月軒文集十卷行世通志

督學李不磷先生于堅

李于堅字不磷清流人崇禎辛未進士起家汾州司理

遷禮部郎中提督浙江學政著有吳楚遊集西河集水

花長句通志

李元仲先生世熊

李世熊字元仲寧化諸生受業於漳浦黃道周性穎悟博極羣書論著裒然成一家凡墳典經史以及釋典道書醫卜星緯之學靡不淹貫著有寒支集寒支二集行世又修寧化縣志新裁獨抒為通儒所稱通志二希堂文集 汀

閩中理學淵源考卷八十八

欽定四庫全書

閩中理學淵源考卷八十九

廣平府知府李清馥撰

邵武明初諸先生學派

按邵武宋代人文特盛迨元諸儒學不衰大抵皆闡經論道之作至有明講述者頗少若朱氏欽陳氏泰之風節鄒氏大猷之經術一時風表尚有典型焉

教諭鄒星臺先生大猷

鄒大猷字星臺建寧人歷益陽教諭矩步動遵先民傳
經授徒務在實行遇人雖年少必均以禮或訓以格言
云道南源委

督學花蘊王先生潤生

花潤生字蘊玉邵武人永樂二年進士幼穎敏書史過
目不忘知古田縣創公署興學政教民種藝為子弟置
書籍親課其業轉知鳳陽太和二縣歷浙江僉事吏部
尚書王直薦其經學通明轉提督浙江學政年七十引

年歸行李蕭然家居二十餘年風節愈勵自號介軒有
介軒集

閔書

巡撫陳吉亨先生泰

陳泰字吉亨邵武人舉鄉試第一除安慶府學訓導正
統初廷臣交薦擢監察御史巡按貴州大軍征麓川歲
取土兵二千為鄉導戰或失利輒取土兵首級冒功賞
泰奏罷之再按山西時百官俸薄泰言羣臣祿入厚者
三石薄者一二石所折鈔又不能即得乞量增祿廩俾

足養廉然後治贓則貪風自息事格不行六年夏以災
異下詔求言恭請言官糾彈大臣去其尤不職者而後
所司各考覈其屬帝從之言官劾者甚衆賜罷者數人
而已後出按山東擢四川按察使不踰年蜀中大治鎮
守都御史寇深忌其才名陰諷所私參議陳敏誣奏泰
杖殺人下刑部獄其人實自溺水死久始白復官于謙
薦守紫荆關額森入犯關門不守復論死景帝宥之命
充僉事官自劾景泰改元陞大理寺右少卿守備白羊

口轉都察院右僉都御史鎮守易州節制紫荆倒馬等
關及沿河關口五年陞左僉都御史疏理徐州呂梁二
洪及臨清濟寧諸處河道七年巡按蘇松常鎮及嘉湖
諸大郡免租詔下泰知恩未得均有富室田多額輕其
重者多在貧下因推廣周文襄法令以五升之田倍其
賦而官田之重止取正額於是賦額不損貧富均適英
廟復辟被譖左遷廣東按察副使連丁內外艱會四川
寇亂復起為左僉都御史巡撫其處蜀中老穉聞泰至

奔走相告曰陳憲使復來矣州郡望風解組者數百人
陞右副都御史巡撫淮揚等處兼督漕運成化元年乞
歸甚切許之泰儀度脩整天性孝友常慕鄉先哲李忠
定之為人平居謹默似不能言立朝論事纏纏如倒囊
出珠素勵操行三為巡按懲奸去貪風稜甚峻累保障
重地積有勲勞未嘗矜色於官無行誼者怒目切齒必
除之乃已以此被讒貶斥其志不少回致仕歸囊無長
物閉戶理舊書間出遊山水哦詩酌酒囂然有餘安成

彭文憲時嘗與莆田柯詹事論人物柯曰清操如吉亨
吾閩少有文憲曰天下士也何止閩中晉王亦稱陳御
史剛風勁節須於古人中求之明史 閩書

教諭陳先生子良

陳子良邵武人永樂間以貢任光澤教諭學規嚴整訓
迪有方邑士以經術顯者多其造就閩書

員外郎余孟高先生隆

余隆字孟高邵之建寧人聰敏慷慨仕吏部員外郎居

官恬退自守不履豪貴門少師楊文貞楊文敏先後冢
宰蹇義及師達黃福皆器重之子志

僉事鄒先生允隆

鄒允隆名昌以字行泰寧人博學多才舉正統壬戌進
士授太常博士陞寺丞改太僕丞天順改元與翰林侍
講學士王諫並使安南時安南經黎季犛之變久昧朝
儀允隆與諫據禮裁正夷酋悚服還復命丁外艱服除
仍丞太僕尋轉廣東提學僉事教諸生以立身行道不

徒習章句文詞而已尋卒

巡撫朱懋恭先生欽

朱欽字懋恭邵武人少與甯堅友共志考亭學聞吳康齋倡道西南不遠師之成化壬辰進士授寧波推官潔白自持讞獄惟允召入為御史論列侃侃銜命視河遇澇災輒發陳賑乏見尸橫野掘廣塚掩葬之旋勅巡按貪吏望風解綬出為浙江按察副使進按察使陞左布政使儼恪端莊官常整肅節濫觴之費謹啟鑰簿正之

司秩祿外秋毫無苟取積羨財倍夙昔勒石以示後來
擢都御史巡撫山東首劾方面官不公不法事某等若
而人正德初逆瑾氣焰遣使詣治索綵繒五百疋有司
具以請欽呵斥使者輒趨歸遂與瑾隙會瑾嫉同監王
岳譖謫守陵南京抵臨清賜死欽疏言陛下首政朝野
仰望威福之權不宜下移刑賞惟公方能即叙太監王
岳謫守皇陵既不白其罪狀賜死中道尤未厭乎人心
臣諗岳為劉瑾所忌必瑾讒毀以惑陛下雖岳死弗足

惜而瑾漸甚可畏伏望察岳非辜誅瑾讒賊庶天下臣子頌陛下之仁恩睿斷草就遣人齎進有止之者欽曰此瑾矯制擅柄之漸吾守土大臣安得無言瑾奪欽疏不奏乃媒蘖其短欲擠之先是欽以東人酣酒遂嚴鬻酒之禁至行連坐法使濟南推官陳元魁覺之犯者枷其項有民汝林之鄰人為酒林懼自縊死林母欲奏聞元魁與之十金知府趙璜亦與穀二石至是為東廠所詞瑾勅錦衣衛百戶陳俊束欽逮獄欽即去冠裳跣步

就束立就道不內顧既入京師結竟其罪與璜同坐免官而元魁為謫戍吏以失解弓張事罰粟三百石輸大同府欽躬詣互納家人請代不許曰天威咫尺萬里敢罔耶尋又文致其罪罰粟輸甘肅未行而瑾伏誅赦復原秩致仕家居衣冠儼坐竟夕無惰與鄉人語必依孝弟禮義每歲孟春舉行冠射古禮示人與新會陳文恭獻章晉江蔡文莊清相善其辨王岳事詳蔡虛齋集作文典實詳贍善書有晦翁風骨卒年七十有七所著有

畏庵集

庠生朱德夫先生昂

朱昂字德夫邵武人郡庠生穎異有文才嘗從教授宣興周衝講致良知之學銳然以聖賢自勵事二親孝侍咸屬仁郡守吳國倫稱有古人風旌之扁閩書

縣令黃廷獻先生琮學派

按廷獻先生志乘稱其自少即志為己之學教士先德行而後文藝大端可識矣

縣令黃廷獻先生琮

黃琮字廷獻邵武人以太學生知安遠縣廉謹靖恭以愛人為主被構逮繫未白而卒民哀慕之琮自少即志為己之學繩趨尺步不苟徇時事親盡孝居喪謹禮與人交誠信不欺教人先德後文一時造就為多閩書

同知甯永真先生堅

甯堅字永真邵武人九歲補弟子員師事黃琮弱冠遊吳聘君之門比壯領鄉薦屢試禮部不偶卒業太學大

司成邱文莊器重之年五十授鳳陽府同知未及再期
卒堅早失怙事母至孝母有疾視起居奉湯藥夜則假
寐母側衣不解帶家居講授善開發人志意從遊之士
多所成就所得修脯之資悉以歸母與弟共之尤致力
冠昏喪祭鄉射諸禮一時風俗為變其莅官寬而不縱
正而不激嘗以巡撫大臣檄督開郵湖畔新河區畫有
方功成而民不擾鳳陽民思之

閩中理學淵源考卷八十九

欽定四庫全書

閩中理學淵源考卷九十

廣平府知府李清馥撰

嘉隆以後諸先生學派

嘉隆以後諸儒述錄頗少恐遺闕必多俟再攷

庠生王昭武先生岳

王岳字昭武邵武人邑庠生資性純潛喜談性命有志聖賢之學聞四方高雅洞見性宗者不憚跋涉北面之

遊近溪羅先生門以明德為宗遂為羅門高足生平矩步繩趨有儼若思氣象居家嚴正動遵古禮

閩書

貢士高先生尚賢

高尚賢邵武人沈潛善文辭究心性命確然以聖賢自勵清貧有守幼年失怙事母孝待弟友愛淹貫百家善於開誘後學生平得力惟母自欺三字凡對之人矢之已無非是者有書數篇未付剞劂氏以貢卒學使者熊公按臨舉鄉賢不果別號文台居士

丘子聚先生九奎

丘九奎字子聚邵武人性端直凝重動循矩度常慕臺
溪先生之為人年未四十謝去青衿于凡經子史百家
九流三教靡不嚮咀聞有奇書不遠百里借閱率手錄
之常曰聖賢心法寄於六經佛老之精不出吾道範圍
而諸子之散見者亦足資羽翼所謂莫不有文武之道
者也居家不尚巫覡祭喪用家禮所著有弋獲解六卷

臺溪浣花詩集二卷

黃世表先生克正

黃克正字世表泰寧人性資純樸潛心道學遊李見羅之門講脩身為本之學

江仰齋先生嶠

江嶠字維鎮泰寧人私淑朱子之學孝弟端謹篤志力行以五經教授鄉里嘗語學者曰正心誠意在格致後原非一味寂守常時提醒此心使動無不當便是身修見羅先生呼為老友世稱仰齋先生

縣令蕭先生重熙

蕭重熙泰寧人生平砥行希蹤聖賢以選貢令靖安地
苦賊而民疲多方綏靖以艱子乞休空橐而歸饘粥不
繼

主事黃先生世忠

黃世忠建寧縣人嘉賓孫萬歷中舉人為東陽教諭擢
刑部主事乞歸居小園抱甕灌蔬長吏罕識其面著有
經濟集十二卷麟經肯定四卷碧澗流玉四卷

舉人張禮言先生能恭

張能恭字禮言邵武人崇禎庚午鄉薦第一所述有李忠定奏議選禹貢訂傳天地大文八十卷通志

閩中理學淵源考卷九十

欽定四庫全書

閩中理學淵源考卷九十一

廣平府知府李清馥撰

福寧明初諸先生學派

福寧僻在海隅宋時名流輩出延至元代儒宗尚踵
起相承至明如蔣氏悌生林氏珙陳氏自新林氏偉
高氏頤皆精專儒學教士傳業稱躬行實體之儒雖
元之遺獻而實有明一代倡學之師也程氏鉅夫謂

自鄉儒先游紫陽之門而絃誦衣冠盛自鄭氏樵師
氏古教授而經術明其所由來尚矣

訓導蔣仁叔先生悌生

蔣悌生字仁叔福寧人檢身勵行雅不出仕洪武初舉
明經任本州訓導教誘諄諄多所成就著五經蠡測五
卷微詞隱義多發前人所未發閩書道南源委

訓導林仲恭先生珙

林珙字仲恭福寧人篤信力行以開來學為已任舉明

經授本州訓導雖窮約泰如也

助教林孔徵先生文獻

林文獻一姓陳字孔徵福寧人博通經學旁及子史舉明經授國子助教立教有方生徒仰之

閩書

縣令高應昌先生頤

高頤字應昌福安人孝友天性臨財以義親沒廬墓三年教授鄉校旬暇輒至墓所拜哭洪武間舉孝廉召對稱旨遂授海鹽知縣卒于官著詩集傳解

閩書
源委

道南

陳貢父先生自新子孟龍

陳自新字貢父號敬齋寧德人通五經精易本傳義而
推衍以皇極經世書從遊者衆著有起興集等書行世
予孟龍字霖卿博學能文洪武初舉明經歷廣東僉事

林先生偉子仕夔

林偉寧德人學問該博與高頤余復為友義方之教甚
嚴子仕夔學行俱粹以廉能見稱官通直郎孫祖泰知

建昌軍

給諫林廷吉先生文迪

林文迪字廷吉寧德人弘治乙丑進士授刑科給事中遇事敢言奉命清糧卒於廣西文迪性敏質粹學博識醇著有五峰遺稿通志

長史周質夫先生斌學派

按周質夫先生在明初以經學著識楊文敏於童年授之以業後為國子師多士悅服固亦一時師範也

長史周質夫先生斌

周斌字質夫寧德人嫻雅夷曠明詩禮二經教授建寧
嚴立教條作新士習與郡大夫語皆政教大端雲南平
進賀表稱旨賜金幣秩滿太祖召至便殿承顧問以質
直見重拜中都國子司業約度明信諸生悅服陞齊府
左長史輔翼開陳一以正道丁內艱卒楊文敏公徵時
斌一見奇之親授以業語之曰子器識非常他日遠到
惜予老不及見也所著有國子先生文集

閩書

縣令陳鼎夫先生新

陳新字鼎夫福安人永樂十二年以貢入國子從楊文敏公學知海陽縣時賦重民困求其弊悉去之每春巡省田野勸課農桑始終不倦

閩書

陳先生廣學派

按先生及門者多而獨著莊敏林公觀莊敏立朝謹論出處諸大節其熏炙師門所得多矣攷莊敏之門如林氏各恂恂言行嘗論學者必以養素自重為先一時師友講習固有淵源哉

陳先生廣

陳廣寧德人隱居授徒多所成就林莊敏聰嘗受業焉既貴寓書於廣稱其自得真趣非語言所能形容者閩書

莊敏林李聰先生聰

林聰字季聰寧德人正德己未進士為刑科給事中景泰元年轉都給事時當英廟之世承平日久言路弗塞聰感激論事無諱及英廟北狩以後益與同官葉文莊盛矯厲奮發所彈劾皆切近內侍及當柄大臣多因以

下獄去者迨額森將送英廟還廷議迎駕景帝既即位
有日不利駕還心欲薄其禮聰獨請備鑾輿鹵簿景帝
廢英廟皇太子自立己子衆唯唯署牘聰獨難之方欲
極論而罷尋遷春坊司直大學士商輅言六科不可無
聰仍補吏科都給事中領司直俸戶部侍郎張睿國子
祭酒劉鉉並用母喪奪情聰上疏侍郎六卿之亞祭酒
師儒之宗忠孝大節不可少欠乞命依例守制不聽復
上言君親人道大倫忠孝臣子大節未有忠君不繇孝

親薄親能厚君者也禮臣有父母之喪君三年不呼其門高皇帝定制斬衰之服父母皆一冒喪匿喪俱有罰禁所以扶綱常維世教豈不嚴哉曩者國家多事內外近侍方面等官奪情起復此令共濟時艱一時權宜也今邊事寧謐方面已皆不許而在京猶或踵舊臣誠愚昧以為大臣之中有一身去就係國安危猶若可言若一槩為例獎且貪戀名爵廉恥不顧視天親若路人希異數如常事伏望當金革之不試舉先朝之舊章裨益

世道殊非淺鮮景帝所立太子薨聰上大寶八事及脩
德弭灾二十條中言今三尺兒童悉念太上皇德獨恥
皇太子見深何故見廢時日曷喪之謠繼出臣不知為
誰陛下幸而聽臣仍將太子立為東駕又言陛下宜虛
己省躬戒玩好之蕩心戒嬪御之燕溺戒用度之過奢
戒逸樂之忘迈戒爵濫施戒刑濫及又言唐虞三代無
有釋道之教齋醮之事然而享壽益高傳祚益久庶政
惟和萬事咸寧自漢以後或捨身施佛或迎骨入禁信

非不專奉非不至而壽未見隆祚未見永治未見古若
二教亡益明甚近者在京寺觀既有齋糧以飯僧又有
燈油以供佛一月而齋幾度旬日而醮幾壇甚至內府
亦行脩設供奉之費既多齋襯之儀不少雖曰內帑實
出民脂以為民祈福而民艱自如以為國禳灾而
天灾屢見伏望悉行停罷庶幾當務為急聽平居恂恂
不為奇異遇事正色讜論確不可奪景泰中諫議之臣
惟聰與葉盛為首稱嘗領會試考官汲汲焉恐失一士

吏部選註未嘗或徇私請輒指斥改易當事者外雖敬
憚中實銜之尚書何文淵以選法不公為聰論罷聰復
時時忤大學士陳循都御史王文循文諷諸御史劾聰
十三道溥等奏聰自効去何文淵之後數挾制吏部尚
書王直紊亂選法詔多官廷鞫以大臣專擅選法論坐
當斬并劾直等阿勢聽囑而大學士高穀獨持正議保
持之禮部尚書胡濱亦曰給事七品官也儻以大臣囑
託公事也儻以選法二者不合遂不與疏歸卧病不朝

上遣中使往問對曰臣故無疾也聞欲殺林聰不覺驚
悸景帝始知聰被構左遷國子學正英宗復辟超遷左
僉都御史賑山東饑全活甚衆還遷右副都御史捕江
淮鹽賊籍其魁而已三年丁內艱明年起復固辭終制
不允至署院曹欽反錦衣官校報復仇怨凡欽姻識一
切逮繫人心知寃度無免理聰力爭出之又一時幸功
者妄取首級京師人至不敢夜出門聰按論捕賊功必
生獲其人成化二年江淮旱饑人相食右僉都御史吳

深巡視民瘼無狀命聰代之九載秩滿陞右都御史七年出巡撫大同逾年致仕越二年起掌南院事又三年召入為刑部尚書加太子少保又明年乞致仕不許十八年卒贈少保謚莊敏所著有見菴文集奏議八卷

閩書

林先生各

林答寧德人嘗從林莊敏游安貧樂善恂恂言行諭學者必以養素自重為先年八十餘

閩中理學淵源考卷九十一

欽定四庫全書

閩中理學淵源考卷九十二

廣平府知府李清馥撰

正嘉以後諸先生學派

按黃氏乾行陳氏襄皆以儒學顯著而立朝又卓然
餘或求師取友或建白當時固皆特立有守君子矣

郡守周懷玉先生璞

周璞字懷玉福寧人嘉靖四年舉于鄉從呂涇野講學

以潛心力行見稱判廣州叢市舶斤絕常賂陞上恩知
州諄諄講論蠻俗一變經營物力以築城門歲成一門
四門成擢恩同知尋擢知府首戒九司曰地方多事
皆因爾輩爭立今若覲素繼法母貸呂馬者岑猛黨也
聚衆為梗兵備曰有周守在母憂旬月馬服罪且納金
為謝累却之入觀乞休不允徑歸粵民兩齋撫按檄至
州促復任竟不起璞與人交若飲醇有過婉諷俾自悟
而中介有不可徇者著一石摘橐與弟珉同以孝友稱

閩書 通志

縣令吳汝礪先生鉅

吳鉅字汝礪福寧人教諭宣城郤贊恤貧師鄒東廓守
益江東麓佃講學淑士令公安以不阿歸宦橐蕭然書
十數篋而已叔玲孤寒鉅為立嗣匀以己產兄鐸死無
子敬禮寡嫂弟鑄早逝撫其二孤庠友程珩疾革偕周
璞旦夕省侍及沒珩妻李亦亡偕璞舉其二喪焉閩書

郡守黃大同先生乾行

黃乾行字大同福寧人父子厚青田訓導嚴直不阿子四長乾清恂恂孝友會試下第製絹衣父知詰之跪伏自責乾德知宣平鋤強戢吏乾行舉嘉靖三十二年進士授行人歷戶部郎中出守重慶誨士阜俗卒于官所著有禮記春秋日錄四方傳之乾行倜儻負義兄乾清病夜覓醫于鄉遇虎不顧乾清子復早卒為昏嫁其孫及孫女弟乾道夭無子養其娶終身閩書

兵備陳邦進先生墓

陳襄字邦進寧德人嘉靖二年進士選侍御史劾胡侍郎提督大同逗遛疏立獻廟疏廖家宰私閣臣所親因乞終養十餘年起復巡按江西夏言為相欲毀民居以益苑囿書以諷之云費鴟湖之變幾至滅族相公方繕歡魚水當造福子孫霍韜嘆曰真御史也左遷韶州推官復謫判泗州久之為慈谿令毀淫祠以祠吳相閩澤唐相房琯之有功德於慈者陞廣西兵備有平僮賊功尋致仕著禮記正蒙驅山集行世通志 閩書

訓導薛宗舉先生公應

薛公應字宗舉嘉靖十七年貢士訓導盱眙教諸生以躬行實踐之學三年乞休子孔洵事公應孝有士行學者稱為企泉先生

李先生中美

李中美福寧人博學好禮雖盛暑衣冠儼然嘉靖晏駕中美蔬素三日與袁撫林子燧陳喜談詩著詩書

玉篇直音

閩書

張美中先生絅

張絅字美中叅議蘭曾孫也惇尚孝友篤志讀書長於詞賦阮雲塘陳鰲溪以文章氣節相高時號三傑閩書

袁先生棟

袁棟福寧人天祿公裔樂易倣儻輕財仗義入深山中苦耽經史與李中美談詩教子學古諸兄弟服其友愛

閩書

陳希和先生喜

陳喜字希和福寧人績學渾樸蚤喪父獨事母孝養至老不衰母年高多病躬伴母寢晨昏溫清衣食櫛盥至渝廁瑣猥未嘗假他人年九十四閩書



閩中理學淵源考卷九十二